


Guhcaemz “Guh Doxfanj”

“对着干”游戏

Ngoezneix mbwn gvengq ronghcingx, gou angq-fwdfwd bae hagdangz. Hwnj dangz goq daih'it, lauxsae cix doiq dou naeuz dangz neix raeuz daeuj guhcaemz, gyoengq doengzhag dingq le bouxboux angq hemqvauvau: “Ndei lai lo, ngamq haihag dangz daih'it gingqyienz dwg dangz guhcaemz.” Cungj guhcaemz neix dwg yienghneix: Danghnaeuz lauxsae naeuz “naengh”, mwngz couh itdingh “ndwn”; danghnaeuz lauxsae naeuz iet “fwngzswix”, mwngz couh ndaej iet “fwngzgvaz”. Gyoengq doengzhag rox gij eiqsei lauxsae le, couh hainduj guhcaemz lo.

Boux doengzhag hwnj daiz byaujyenj daih'it, naj gyaenggywt, yawj hwnjbae gig gaenjieng. Lauxsae naeuz: “Naengh!” De gingqyienz naengh roengzdaeuj dahraix, baihlaj lumj youz ndat ndaw gu deng raemx sinz nei, daihgya cungj riuhaaha, boux doengzhag guh loek le naj nding'nyan, mbouj eiqsei buet roengz daiz daeuj. Ciep roengzdaeuj, gyoengq doengzhag laebdaeb hwnj daiz byaujyenj,



gij ciusoq lauxsae yied ok yied gaumingz: Sing “mbouj bae diengzhaex” ndeu, song boux doengzhag vatvet buet haeuj diengzhaex bae; sing “okdaeuj ba” ndeu, song boux doengzhag okdaeuj lo. Hahaha! Haeuj hongx lo. Daihgya riu dwk mwngz dak gou gungj. Laebdaeb guhcaemz, lauxsae naeuz “mbouj doxmoeb”, doeklaeng Lij Denhciegz caeuj Bwz Yizmingz lumj song duz lingz nei, gaeu ngwz nyauj naj, vid gen vid ga, “moeb” youq doxcaez. Daengz gou hwnj daiz lo, gou saenqsim cibcuk, cungj guhcaemz genjdanh neix, doiq gou daeuj gangj heih lai lo. Doeklaeng cungj dwg gou liuh mbouj daengz, lauxsae ngamq roengzlingh sing ndeu gou couh baih roengzdaeuj lo. Ai, caen saetnaj.

Mbouj rox mbouj nyinh, dangz goq neix youq ndaw singriu angqyangz gietsat lo, cungj guhcaemz neix mizyinx lai lo!

(Hoznanz Swngj Gaihfungh Si Wswh Fusiuj sam nienzgaep Lu Yinhanz)

Lwgmui Caeuq Lwgvaiz

小熊和小牛

Youq ndaw ndoeng-faex gyaundeix, miz hauj-lai doenghduz iq dwggyaez youq.

Miz ngoenz ndeu, lwgmui okbae youzbyaij, sawqmwh yawjraen go faex hung he laemx roengz vang youq gyang loh, hawj gyoengq doenghduz mbouj miz banhfap gvaq loh, lwgmui sikhaek buet gvaqbae, dawz go faex de buen daengz henz loh bae.



Mwhde, song lwgdouq byaij gvaqdaeuj, cingq yaek byaij gvaqbae, lwgmui ganjip doiq songde naeuz: “Sou yawj, dwg gou dawz faex buen daengz henz loh bw.” Lwgdouq riu naeuz: “Gyo' mbaiq lwgmui, danghnaeuz mbouj dwg mwngz, dou couh mbouj miz banhfap gvaq loh lo!” Lwgmui gaeugaeu gyauej, ndawsim gig rimhoz. Sam duz lwgyiengz byaij gvaqdaeuj, lwgmui youh naeuz: “Lwgyiengz, sou ndei, haxbaenh go faex hung neix laemx youq gyang loh, dwg gou dawz faex buen daengz henz loh, mboujmiz sou couh byaij gvaqbae mbouj ndaej lo!” Gyoengq yiengz lienzlien biuji gyo' mbaiq, naeuz: “Lwgmui mwngz caen ak, dou lawh gyoengq doenghduz gyo' mbaiq mwngz!” Lwgmui dingq le, roxnyinh swheij ak raixcaix, daekieq vauvau riu lo.

De laebdaeb byaij baenaj, sawqmwh yawjraen baengzyoux ndei lwgvaiz de, lwgvaiz yawjraen gwnz giuzfaex iq miz aen congh ndeu, yienghneix couh dawz hongdawz daeuj nyinhnyinh caencaen coih aen giuz. Mbouj geij nanz, giuzfaex couh coih ndei lo, aen naj lwgvaiz riunymnyum. Mwhde, gyoengq doenghduz daj gwnz giuzfaex byaij gvaqdaeuj, naeuz: “Yi, dwg bouxlawz coih ndei aen giuz lone?” Lwgvaiz youq henz mbouj ok sing. Lwgmui dauqdae nyenx mbouj youq lo, buet gvaqbae cam lwgvaiz: “Mwngz vihmaz mbouj caeuj gyoengqde naeuz dwg mwngz coih ndei aen giuz ne?” Lwgvaiz giemhaw naeuz: “Nanzdauh guh saehndei le couh itdingh gangj okdaeuj ha?” Lwgmui dingq le, naj ndingfwdfwd, najmong dwk ngaem gyauej roengzdaeuj lo.

Daj baezneix hwnj, lwgmui caeuj lwgvaiz ityiengh, guh saehndei le mbouj caiq dauqawq gangj, hoeng gyoengq doenghduz iq ndaw ndoengfaex cungj rox, doenghgij saehndei neix itdingh dwg songde guh!

(Denhcinh Si Hungzgyauz Gih Sizyen Siujyoz sam nienzgaep Vangz Yihih)

“Roegvenz” Ban Dou

我们班的“百灵鸟”

Aen naj hoengzmaeq luenz-lu, lwgda danfungh saeqraez, aen bak hung laj aen ndaeng iq miz di doed de daegbied yinx vunz cimyawj, neix couh dwg doengzhag gou—— Luz Yijsenh. Cijaeu de hai aen singhoz de, mwngz couh dingq ndaej nyi singgo ndei dingq de, yienghneix, dou cungj heuh de guh “roegvenz”

Gangj hwnj “roegvenz” Luz Yijsenh, caen dwg byaij daengz gizlawz ciengq daengz gizde. Gyanghaet, byaij youq ndaw hagdangz, de riengz yinhyoz ndaw gvangjbo ciengq hwnj go 《Gyanghaet Hagdangz》; mwh roengzdangz, de riengz 《Daih Loqsiengigya》 itmienh ciengq itmienh diuq, yinxndaej dou hix caeuj de doxcaez ciengq diuq; mwh banringz doegsaw, de gaem bonj saw ndeu, ndaw bak hix cungj singmbaeu damz geij coenz, neix couh dwg ciengqdoeg ndei dingq dou…… Aenvih miz de seizseiz gizgiz buenxcienq, saedceij ndaw hagdangz dou miz sing miz saek!

Miz baez ndeu hagdangz hai vanjvei, riengz dwk yinhyoz rwenzrwz yiengj hwnj, dahsien ndang daenj vunjgizbauz, ndaw fwngz gang aen liengjbaengz yaenq va auej ndeu, menhmenh byaij daeuj. “Gyanghnanz ndaej sou ngaeux, mbawngaeux mbaw dam mbaw……” Singgo rwenzrwz sikhaek sawj gyoengq doengzhag haeujmaez lo, dou lumj ndwn youq ndaw gyang nazngaeux, ngonzyawj baenz duj baenz duj va'ngaeux maeq, Luz Yijsenh couh vaq baenz dahsau gyanghnanz ndeu naengh ruz gvaq-daeuj…… Singgo de seiz he mbaeu, mbaeu ndaej sawj dou mbouj gamj diemheiq; seiz he menh, menh ndaej sawj dou laep da caem youq ndawde. De mbaeu ciengq menh damz, dawz gij unqswnh dahsau gyanghnanz cungj yienh okdaeuj caez; de youh sing sang ciengq dwk, dawz gij gikcingz dou coemh dawz, riengz de doxcaez youh ciengq youh diuq!

Neix couh dwg doengzhag “roegvenz” dou—— Luz Yijsenh, danghnaeuz mwngz siengj dingq singgo ndei dingq de, couh daeuj ban dou dingq-dingq ba!

(Gyanghsuh Swngj Nanzdungh Si Haij-mwnz Gih Dunghcouh Siujyoz haj nienzgaep Sih Haucwngz)

